



Athinbyâye jènèrale ordinèra anuèle di Takounè
le devindro 21 d'èvri 2023 ou Kafé de la Kri Fèdèrale ou Krè

A vint-àr'è-dji (20h10) Madama Charlotte Fisler, nouthra prèjidinta, àrè l'athinbyâye.

Kouâ la binvinyète a totè è ti. Chaluè achebin le prèjidan Kantonal, Moncheu Marcel Thürler.

Modifikachyon dou traktanda : No fô betâ on pouin dèpye apri la vèrifikachyon di konto. L'è la nominachyon di vèrifikateu. Adon l'y arè le poin thin : nominachyon di vèrifikateu.

Vo j'ithè dakouâ avui chin o kôkon l'a ôtyè a dre kontro chin ?
L'athinbyâye è d'akouâ è la prèjidinta la rêmârhyè.

A la fin de l'athinbyâye, apri le tèâtre, la chochyètâ ofrè ouna pitita kolachyon, le brè cherè a la tsèrdze di minbro prèjin

La lichte di prèjinthè l'è pachâye pèrmi lè minbro. L'è demândâ achebin de notâ chu ha foyie vouthron e-mail (che vo j'in d'avi yon), pèchke dinche la chochyètâ pori fére kotyè j'ékonomi de papê è de tinbro. A parê, che l'è pochubyo, chin cherê bin de pâ payi la kotijachyon pè la pouchta (avui le BV) pè la mô ke, che vo j'alâde payi ou guichet, chu la kotijachyon de vin fran, la pouchta no prin dou fran : lè Takounè rêchouèvon tyè 18 di 20 fran ke vo payidè. Adon, che vo j'inpyèyidè pâ l'Internet è l'e-banking a la méjon, vo puédè vinyi payi ouè inke vè Christiane ou bè de l'athinbyâye (dèvan le tèâtre).
Marthi bin de no j'idji a kudji de fére na tyèta d'èkonomi !

55 minbro chon prèjin, è 9 chè chon ekchkujâ :

Moncheu André Ayer
Madama Françoise Ayer
Moncheu Titi Bertherin
Moncheu Jean-Daniel Favre
Moncheu André Genoud

Madama Dora Genoud
Madame Mimi Pilloud
Madama Hélène Vauthey
Moncheu Philippe Vial

Dèvan de kontinuâ, la prèjidinta demândè d'avè on moujiron po hou ke no j'an tyithâ po alâ vè le gran patheryâ :

Moncheu Loulou Millasson
Madama Gilberte Terrapon

Madama Jacqueline Genoud
Madama Estelle Demierre

On gro moujiron por li. No fan 'na menutè de tyèja.

Nominachyon di chkrutateu : Madama Cécile Mettraux
Madama Roseline Monnard

Protokole de la dèrire athinbyâye 2022 :

Vo j'i pu yère la patarafa din la biyôta ke no vo j'in invouyi l'ôtri. Dinche no van pâ la yère adi. Vo j'avâ pout'ithre di tyachyon ou di rêmârkè a fére ? Na, pâ de tchèchyon. Che vo volè l'aprovâ, vo povè lèvà la man.
La patarafa de dou mil vint'è dou l'è aprovâye a l'unanimitâ.
La prèjidinta rêmârhyè Fanchèta po chon travô chu chi PV.

Rapouâ dè la bochère :

Christiane Hübscher prèjintè lè konto 2022 è bayè kotyè j'èkchplikachyon.

Lè tsifro chon yu in franché è lè j'échplikachyon achebin.

La fortèna ou 31.12.2022 chè montè a CHF 38'363.58, lè rèvunu a CHF 21'420.60 è lè tsèrdze a CHF 17'400.23. Chin fâ on bènèfitho dè CHF 4'020.37.

Pâ dè tchèchyon nè dè rêmârkè.

Rapouâ di Vèrifikateu :

Dèvan dè bayi la parola ou vèrifikateu, la prèjidinta bayè kotyè j'èchplikachyon :

Christian Menoud irè vèrifikateu l'an pachâ ma ora l'è j'ou nomâ ou komité è i pu pâ mé fére la vèrifikachyon.

È pu, malirâjamin, Loulou Millasson k'irè le chuplèan, l'è pâ mé avui no. Adon, chochrâvè rin mé tyè on vèrifikateu è no j'an du fére ôtramin (por ithre in ouâdre avui lè chtatu). No j'an dèmandâ a kôkon ke l'è dza j'ou nomâ pê l'athinbyâye din lè tin pachâ. Adon no j'an dèmandâ a Marianne Berthoud dè no j'idji è l'è j'ou d'akouâ dè fére vèrifikateu po chti kou. Ora mè fô vo dèmandâ che vo j'ithè d'akouâ avui ha fathon dè fére ? Ôtramin no fudri fére oun'athinbyâye èchtraordinère din kotyè tin po lè konto 2022. Che vo j'ithè dakouâ, vo prêyo dè lèvà la man.

L'athinbyâye l'è dakouâ a l'unanimitâ. Le komité la rêmârhyè po la konfyanthe !

Ou non di vèrifikateu Moncheu Gérard Guillet è Madama Marianne Berthoud rêmârkon ke lè konto chon fèrmo bin tinyè. I rêmârhyon Christiane Hübscher po chon bon travô è dèmandon a l'athinbyâye d'in bayi dètsèrdze a la bochère è ou komité.

Pâ dè tchèchyon nè dè rêmârka. Lè konto chon aprovâ a l'unanimitâ.

Nominachyon di vèrifikateu :

No fô adi nomâ di novi vèrifikateu è vèrifikateu-chuplèan. Le komité propoujè 'na vèrifikatrice : Rosemarie Dévaud è 'na chuplèante : Anne-Marie Balmat.

L'athinbyâye l'a pâ d'ôtrè propojichyon è l'è dakouâ a l'unanimitâ.

Marthi po vouthra konfianthe è marthi a Rosemarie è Anne-Marie d'avi akchèptâ chi l'ingadzèmin !

Adon po lè konto 2024, lè vèrifikateu cheran : Rosemarie Dévaud è Gérard Guillet, è la chuplèante : Anne-Marie Balmat.

Na rêmârka : a l'athinbyâye dè l'an ke vin no fudrè nomâ on vèrifikateu chuplèan po ke Anne-Marie puéchè rinpyathi Gérard Guillet ke l'a dza fê kotyè j'an vèrifikateu.

Rapouâ dè la prèjidinta :

Adon, apri l'athinbyâye d'èvri l'an pachâ, irè pye trantchilo po le tèâtro, ma lè vèyè l'an kontinuâ.

Le novi komité ch'è konchtituâ è l'a pu keminhyi a inkotchi la fitha di 40 an. I vu vo dèvejâ on pou dè chi komité :

a) La prèjidinta è le vice-prèjidin chon adi lè mimo : Jean-Pierre mè chèkondè kan l fô, l'è todoulon inke po mè chotinyi kan ôtyè mè fâ dou pochyn (è l'è pâ le cheul ke fâ chin). L'è Djan-Pyéro ke fâ le lin avui le rèchtoran, rèjèrvâ lè châlè, dichkutâ lè menu avui lè dzin de la Krê, le fâ achebin avui Christian, di kou avui David.

b) la grâta-papê l'è adi Françoise (ke fâ on mache dè travô, l ché dabouâ pye bin kemin li dre marthi!). Fanchèta l'è achebin ma chèkonda titha kan l'y manké ôtyè a la premire...

c) Christiane Hübscher l'è j'ou d'akouâ dè prindre la tyéche. L'è bin vayinte pèchke l'è le premi kou por li. È in dèpye lè tsifro è lè karkul in patê, l dé ithre bin pye difichilo. Li fô kontinuâ lè kour vè Colette !

d) David è Christian chon minbro chin "portefeuille". I chon le "bré armâ" dou komité por idji a totè chouârtè dè travô (chuto achebin po lè tsoujè ke dèmandon di muchkle !). Chti an, iran ti dou lè dèlègè dou komité po fére la vijita di kour dè l'evê dèvan Tsalande. L'an fê chin dè bin galéja fathon, rèmarhyin bin !
e) mè fô onko vo dre ke no j'an ora ouna kobya ke chè tsêrdzè dè to chin ke fô po le tèâtro è ha tropa l'è menâye pê François Blanc ke fâ chin avui gran kâ ! Marthi Franthè po ton travô !

Po la chuite dè mon rapouâ :

Apri lè vakanthe dou tsôtin, in chaptanbre, kotyè j'on d'intrè no l'an pu alâ a la fitha internachyonale di patè a Pouèrintru. Irè na galéja fitha yô chon j'ou nomâ mantinyâre vè lè Takounè : Paul Menoud, Gérard Guillet, André Genoud è vouthra charvinta. Lè kour dè l'evê l'an rèprè in chaptanbre achebin. Chon duvè galéjè kobye le delon è le demâ, dayeu no j'an di novi minbro grâthe a chin !
Le 31 d'oktôbre no j'an pu fithâ lè 40 an di Takounè. Vo puédè vère lè foto chu le chitse di patèjan.
La vèya dè Tsalande po lè minbro aktif ch'è bin pachâye achebin.
Du janvyé dè chti an, la tropa dou tèâtro (na partya dè la tropa) vo j'inkotyè na pitita pithe po l'athinbyâye dè chi dzoua : tan dè boura po na potse ! L'è na pithe in on akte dè Javyé Brodâ
Adon chin l'è la tsouja ke vindrè tot-a-l'âra. Marthi a tota la tropa : I mè rëdzoyè dè vère vouthra produkchyon !

È po chin ke va chè pachâ du vouè :

Apri le galé tèâtro dè l'an pachâ, le komité è la tropa l'an dèchidâ dè rënovalâ l'èchpèryanthe è no j'an dèmandâ a Nicolas Bussard rè dè èkrirè n'a pithe por no. L'è in travô. No j'an rèchu la premire vèrchyon.
Adon Gérard Guillet va dyora rè-avê dou travô dè tradukchyon po Lè Takounè. I vé profitâ k'on dèvejè dè chin po rèmarhyâ Djirâ po chon grô travô chu *Le jule* dè nouthrè 40 an. Le komité li bayè on bon de repas dè 100 fran a la Kri Fèdèrale dè la pâ di Takounè.
L'y arè achebin adi rè la chayète di minbro di Takounè ! Vo puédè dza notâ la dâta : le dechando 26 dou mi d'ou 2023.
È on chè rëdzoyè dza po le tèâtro dou mi dè mâ 2024 : 8-9-10 è 15-16-17 dè mâ 2024.
ndlr : lè dâtè l'an tsandji in apri dè l'athinbyâye.
Lè novalè dâtè chon : 23-24-25 dè Fèvrè è 1-2-3 dou mi dè Mâ

Admichyon - dèmichyon dè minbro :

Ouna dèmichyon chti an : Mireille Favre.

Chat'admichyon è chin i fâ bin pyéji : Hermine Blanc, René Clerc, Antoinette Dénervaud, Kyra Hübscher, Marie-France Monnard, Martine Rey, Anne-Lise Thürler.

La prèjidinta chè rëdzoyè dè lè j'akuyi inke è lou kouâ a totè è ti la binvinyète din l'amikale di Takounè

Rèmècha di Takounè d'ouâ

L'amikale bayè on takounè d'ouâ a ti hou ke l'an j'ou minbro du l'y a vint'an.
Chti an l'y in d'a yon : Jean-Michel Currat, dè Porsel (Jean-Michel l'è pâ inke chta né).
Fèlichitachyon è marthi a li d'ithre fidélo a nouthra chochyèta.

Kour dè l'evê :

Cécile Mettraux mènè to dè gran la kobya dou delon ou Krè. I prin la parola.
Colette Esseiva mènè la kobya dou demâ (lè kour dè l'Univèrchitâ Populère). I prin la parola achebin.

Marthi a vo ti po lè travô ke vo fédè, è po fére a tsèvanhyi chi bi lingâdzo.

Divê :

La prèjidinta l'a dutrè tchèchyon a pojâ a l'athinbyâye :

- la premiere l'è po la dâta dè l'athinbyâye : tyè ke vo prèfèridè ? On devindre né kemin ouè ou bin on dechando le dumidzoua kemin l'è le ka din lè j'ôtrè j'amikale ? L'athinbyâye âmè mi le devindre né.
Adon cherè : le 3jime devindre d'èvri, le devindro 19 d'èvri 2024 a 20 àrè.
- la chèkonda l'è 'na tchèchyon d'Internet : i cheré intèrèchi dè chavê nekoué d'intrè vo vijitè du tin j'in tin le chitse internet di patêjan ?
Environ 1/3 di pèrchenè prèjintè van chu Internet.
Pèchke le chitse « patoisants.ch » va dyora avê na novala vithire. I cherè prèjintâ a l'athinbyâye kantonale ke vin (le 29 d'èvri).
- I vu adi fére on bokon dè rèhyâma po le novi lèvro in patê ke l'è chayê l'y a on mê. L'è a non « Fabuleux », l'è Djan Tsérère (dè Tsarmè) ke l'a tranchlatâ di Fables de Lafontaine (40). I chinbyè balèbin intèrèchin, l'y a la vèrchyon orijinale, la tradukchyon in patê è pu dèkouthè l'y a rè la mima tsouja tranchlatâye mo t'a mo dou patê in franché. I dê bin alâ por aprindre le patê !
In dèpye l'y a di QR-code por akutâ lè textes in patê ou in franché.
Adon vo puédè trovâ chi lèvro din lè librairie, ou j'édithyon Montsalvens ou bin vè Djan (Djan cherè achebin a l'athinbyâye kantonale dechando ke vin).

La prèjidinta bayè la parola a Marcel

Marcel bayè di novalè chu lè j'inichyachyon a l'èkoula primère è chu lè tsandzèmin dou chitse Internet ke cheron prèjintâ a l'athinbyâye kantonale.

Lè patêjan de la Grevire van fithâ lou karant'an le ché d'oktôbre 2024.

Marthi Marcel po totè hou novalè

Pâ d'ôtrè divê nè dè rêmârkè dè la pâ dè l'athinbyâye.

La prèjidinta rêmârhyè totè è ti d'ithre vinyè è dè la konfianthe è lou kouâ onko na bouna vèya.

L'athinbyâye l'è lèvyè a nov'arè è vint-è-thin.

La grâta-papê
Françoise Vial
21.04.2023